




D. O. M.
THESES
ANATOMICO-CHIRURGICÆ.
DE
LABIORUM CANCRO.

QUOT horrent spinis vitæ tramites ! Dum ab imminen-
tibus aculeis refugimus cautissimi , sanitatis occultata rosis
maurant nec rarè mortis semina. A pustulâ incipit quando-
que lethalis morbus , qualis teterrimus ille de quo , præli-
batâ labiorum anatome , dicturi sumus.

I.

BINA oris hiatum constituunt labia in superius & in in-
ferius dividua. Quæ musculoso potissimum & cellulari textu
A

Cc



conflata, miliaribusque distincta glandulis pilorumque bulbis vestiuntur cute extus, intus verò membranâ quâ suppedatur cuique labio habenula quam *frenulum* vocitant.

Inter Anatomicos dissidium peperit varius cujusque labii musculorum numerus quem ad quatuordecim usu probatissimo referemus.

Communes dicunt musculos qui utrique labro, & proprios, qui uni alteri-ve movendo inserviunt.

Communes. Abducunt utrinque labiorum angulos *Risores* duo, *Zygomaticus* nempe quandoque duplex & *Buccinator* ductu *Stenonis* salivali perforatus: elevant autem *canini*. Constringit fibris quasi arciformibus labia musculus *orbicularis* dictus.

Proprii.

Elevat superius labrum ab utraque parte *incisorius* major, minor verò seu *Cowperi elevator* inferius, quod à *triangularibus* & *quadrato* vel menti *apice* depressum volunt plerique.

Quas *coronarias* nuncupant, à carotidis externæ ramo scaturiunt arteriæ; venæ autem in jugulares externas sese exonerant.

A maxillari tum superiori, tum inferiori, quin imò à durâ septimi paris portione originem mutuuntur nervi.

I I.

ANOEPS & ambigua vocis *Canceri* enodatio. Sic dictam fuisse à similitudine animantis canceri contendunt *Galenus* (a) & *P. Ægineta* (b). Sed suo quisque more rem explanat. Ut ut sit, cancerum, uberiores scirrhi sobolem; ex aliis identidem morbis oriri posse constat experientiâ. Quem diduxere scriptores in desumptas è morbi temporibus species, quas describendo segregatim exponemus.

Non semper eadem est cancro nascenti facies. Modò unum, modò plura renitentia prodeunt instar uvæ tubercula quorum titillatio, uredo, dolorifica vellicatio pedissequæ.

Canceri incipientis forma multiplex.

Interdum verrucula figuram induit cancer, quem si tetigeris, non sine molestissimo quodam doloris morfu, sanguinis aliquantulum elicitur. Insequuntur crustula indiciaque alia paulo antè recensita.

(a) Method. Med. ad glauc. Liv. II, Cap. XII, Chart. Tom. X, pag. 390.

(b) Lib. IV. Cap. XXXI.

3

Corneam naturam aliàs & formam mentitur labiorum
scirrhus cujus radix in cancrum (a) degenerat.

I I I.

IN altero degeneris scirrhi stadio adaugetur durities, as-
peritas, tumorisque moles. In subrubrum, lividum, nigri-
cantem alternis transit vicibus colorem summa cutis. Hinc
& indè varicosæ & recurvæ serpunt venæ. Titillans, urens,
lacerans, pungit dolor.

*Cancer confir-
matus sed oc-
cultus.*

I V.

NON multò post irrepit latiùsque grassatur malum. Supre-
mam quâ tumor obtenditur tunicam arrodit collectiria humo-
rum illuvies. Callosa patet caruncula quæ citò spontaneâ ro-
sione exeditur. Ulcus asperum & inæquale oris tumentibus
durissimis, & inversis, fœtidissimâ, tenui, modò fuscâ,
modò nigrâ sanie teterrimum est.

*Cancer ulce-
ratus apertus-
ve & juxta
quosdam, car-
cinoma.*

Luxuriantur quandoque fungosæ carnes quæ exulceratione
alternâ erosæ iterùm atque iterùm à radicibus repullulant do-
nec nudentur ossa.

*Cancer fungo-
sus.*

Cum eò miseriæ res processit, quanta malorum ilias!
lethifera (b) putredo, rodentis veneni virulentia (c),
acutorum morborum cruciatus, chronicorum diuturnitas,
quantulacunque mentis alienatio, oculi duri sunt, neque
acutè cernunt, sitis detinet, papillæ aridæ sunt nares
siccæ & obductæ neque elevantur, spiratio est imminuta, (d) quin
etiam odoratûs sæpè, auditûs interdùm & gustûs deprava-
tio est. Quid plura! exsuccis quasi ossibus, febriculâ, dolo-
ribusque tabefactos vapidus crebrò deficit animus &
vita denique. Quos nonnunquàm, sive arteriâ erosâ,

*Ultimus can-
cri gradus.*

(a) Talem circumcidit & feliciter curavit D. Gabon hujus-ce Colle-
gii Magister.

(b) Proponit *Gualt. Harris* exemplum Medici cui, post uxoris ex ul-
cerato cancro obitum, semper adeò in naribus mansit intoleranda odoris
fœditas, ut tandem ipse confectus obierit.

Et aliud Chirurgi qui cùm, inter occulti cancri extirpationem, col-
lectum in vesiculâ humorem degustasset, tam misère infecta est sua
ipsum lingua, ut exindè insuperabili nausæa tabidus temerariam morte
indagationem luerit. Dissert. X.

(c) *Ætium* tetrab. IV. sermo IV. cap. 43.

(d) *Hipp. Foës* de morb. mulier. lib. 11. sect. V.

4
sive venâ quâvis paulò majori, sanguinis interimit profusio (a). Interdùm verò æger, intra os serpente morbo, suffocatione enecatur (b).

V.

*Ulceræ can-
crofa.*

IRRITATIONE solâ pessimas solidis & fluidis corporis humani inferri mutationes comprobant orta ex punctura, nervorumque vel ἀπορροσίων dilaceratione mala. Si quid verò strumosi, scorbutici, venerei, melancholici, &c. irritatio traxerit secum: ulcera fieri poterunt carcinomati simillima, qualia nec semel exasperatis frigore aut summæ membranulæ laniatu labiis advenêre (c).

V I.

INTERNÆ sunt cancerorum causæ & externæ. Inter internas annumeratur hæmorrhoidum vel menstruorum suppressio, atra curarum moles, melancholia, &c. Labiorum autem morsiculæ, ictus, contusio, eluendæ scæditatis incuria & alia §. superiore descripta inter externas & internas promiscuè habenda sunt. Id mali citiùs eveniet, si quæ comburant, vel rodunt aut validissimè discutiunt, quæ pingua sunt, seu resinosa, medicamenta, glandulis scirrhis vel etiam quibusdam mali moris ulceribus temerè fuerint imposita. E variarum, quas suprà recensuimus, causarum coïtu cancer videtur exoriri. Cæterùm de genuinâ vitii cancrofi indole curiosè non satagemus, quæ doctissimis toties illisit naturæ ventilatoribus. Quî verò morbus ex indolentiâ ad dolorem transeat, exponere paucis tentemus.

(a) Quandam vidimus vetulam cujus inferius labrum mentumque claviculis tenis adeò fuerant depasta ut, prorupto è jugularibus venis sanguine, repentinâ morte occubuerit.

(b) Anus cui cancer, sinistro labrorum angulo absumpto, indè ulterius sub linguâ serpebat, cum thoracis affectionibus quas catharrales ipsa dicebat, obnoxia esset, ingruente suffocatione è vivis rapitur. Clar. Morgagnus citatus à celeb. Lieutaud. Historia Anat. Medic. sistens cad. extispicia, in-4°. Tom. I, Lib. II, Obs. IV.

(c) Wan-Swieten in §. 352.

V I I.

Ex imminuto perdiù & abolito quidem sanguinis & lymphæ potissimum degeneris motu nihil ulterioris mali consecutum fuisse multiplex comperit experientia. Fiat tamen in æconomia animali, qualicunque causâ, motus concitator, stativus magis magisque contaminabitur humor, usque adeò ut, dilaceratis valis, factâque effusi humoris colluvie, cuticula lividis, rubentibus, fuscis fœdata maculis apparuerit. Quod celerius fiet dictorum §. V. medicamentorum applicatione.

V I I I.

Ob faciliorem exterioris auræ aditum, ulcerato cancro, gliscet olidior putrefactionis lues, hincque doloris sensus acuetur. Inaccessio enim externo aëre, difficulter spontè suâ fœtorem progredi experimentis edocemur. Undè duplicem putredinis speciem distinctam voluerant veteres medici, imperfectam scilicet & perfectam. Verum enim verò inolenti & sanguinolentâ referros lymphâ cancriferos quosdam tumores in mammis obvios sibi fuisse celeberrimus scripsit *Monroo* (a); in quos, factâ quâ rueret sanies punctiunculâ, irrupit brevi fœdissima putredinis contagio.

I X.

Ex hâc cancri vel accuratissimâ descriptione non ità in promptu est diagnosi, ut ne peritissimis quidem unquam dubia videatur.

X.

Non proclivior ad prognosim patet aditus. Attamen quò minor recentiorque morbi labes, eò certior ac facilior curatio. Irritam sæpè passus est operationem vetulus latusque cancer, sæpius ulceratus, sæpissimè ex ulcere subortus degeneri. Cæteris paribus, felicius ac citius curationem recipit gravissimum hoc malum causis primò evocatum externis quàm

(a) Observat. de Méd. de la Société d'Edimbourg, Tom. V, pag. 524.

internis, in juvenili corpore quàm in seniculo & boni habitus quàm mali, &c.

X I.

VARIA pro variâ morbi conditione therapëia. Periclitationis adversæ pertasi periculosissima cancro medicamenta prisca judicaverant artis principes. undè divus senex (a) : *Quibus occulti cancri fiunt, non curare melius : curati enim citius intereunt, non curati verò longius vitam trahunt.* A plurimis retrò seculis, num feliciores ab hâc parte fuimus? Neutiquam. Ex tot decantatis non jejune remediis præstantior sanè & palmaris adhuc cancri medicina habetur extirpatio.

Quod opportunam sedem occupat, præfectâ in crucis modum tunica, mobile circumcidendum est tuberculum (b).

Si verò altius insideat tumor, instituenda est labri leporini operatio. Tum secandi, tum adunandi modus peritissimos inter Chirurgos discrepat. De quo doctrinarum divorcio differere angustior vetat pagella. Quem plura juvant, consignatum adeat velim nuperrimis Academia Chirurgicæ actis commentarium (c) in quo novæ conditor methodi deformitati, dolori simul & moræ prospexit feliciter vir de re Chirurgicâ præclare meritus M. Louis. Quam idè avidè delibatam nobis hîc liceat describere.

Ægri situ, loco & tempore ad operationem accommodatis, extentoque labio, si superius, litteræ græcæ Δ. Si verò inferius. V. figuram referens scalpello ritè peragitur sectio.

Quas coadunet Chirurgus, oræ ministri digitis committendæ. Exule acicularum acuumque supellectile potior sæpius visa est fascia tres ulnas longa, pollice uno lata & duplici convoluta glomere, quæ imposita fronti media ponè aures pergat ad cervicem. Hinc, factâ decussatione, & submisso utrinquè circâ malam splenio ministri digitis succedaneo, uterque reducitur ad fissum labrum globulus. Hîc in perforatam consultò fasciam unus trajectatus ad aures revertitur & ita, vice mutatâ, ad labium, ut, adductæ in unum vulneris oræ apprimè glutinentur.

(a.) Hippocr. Aphor. 38, Sect. VI.

(b.) Anatomie de Palsu, Tom. I, Cap. XIII. Sic terna avellanæ formâ secuit mirè perfanavitque D. Sue hujus-ce Collegii præpositus & Anatomies Professor Regius.

(c.) Mém. sur le Bec-de-lievre, pag. 385 & suiv. T. IV.

X I I.

Nisi edentulis quibusdam ægris aut vitiatis labiorum angulis vix profunt futuræ. Quin etiã plagæ oras non acubus, sed compactis nodatione Chirurgicâ futuris committendas esse arbitramur.

Ad sanum usque (a), secari tumorem conclamitant expertissimi artis antistites. Sin aliter obducta dehiscit spontè cicatrix, redivivaque truculentiùs sævit populabunda lues. Superstitibus canceri radicibus abradendis admovent hâc imbuti disciplinâ quidam candens ferramentum, quod, etsi sæpè profuit, sæpiùs etiã, magistrâ experienciâ, obfuisse testamur; undè parcissimâ prudentissimâque manu adhibendum.

Quod si omnem adunationis spem ademerit canceri amplitudo, ægrotantis incolumitati unicè consulendum est extirpatione, ne præcipitaret in pejus omnia curiosius elegantie studium. Cui arrisit sententiæ *Fabricius ab Aquapendente* (b).

X I I I.

Ubi verò in memoratum §. III. casum ferocior inciderit morbus, huic debellandæ hydræ hùc usque paria omnino desunt arma, in quâ mitigandâ nec redundat ulla artis asrutia. Sua quisque commendat remedia. Pauca tamen cum lectissimis decerpemus auctoribus. Ut putà fonticulos; è vegetabilibus, hyosciami succos & folia solani, sedi vermicularis (c), cicutæ, flores papaveris, dauci sativi radices, &c. E Chymicis, sal saturninum, &c. quibuscumque verò mali gradibus laudabilis colluctabitur Hygieine (d).

(a) *Paré*, Chap. XXXI. *Fabricius ab Aquapend.* Chir. Oper. Cap. XXIX.

In labris si canceri fiunt, hi protinùs ità excidendi sunt, ut semper aliquid ex sanâ parte tollatur. *Platneri*, Inst. Chir. §. 271.

(b) *Fabric. ab Aquap.* loc. cit.

(c) Sedum vermiculare flore albo vulgò gallicè: *Tête de Souris*, feliciter expertum decantatur à *Clar. M. Quesnay* in libro cui titulus est: *Art de guérir par la saignée*, pag. 271.

(d) Plurimum prodesse victum ex lacte solo cum pane exemplis probavit compluribus *Deidier.* *Traité des Tumeurs*, Chap. VI, pag. 119. & *Vacher*, *Dissertation sur le Cancer des Mamelles*.

Has Theses DEO JUVANTE, & Præside M. JOANNE-BAPTISTA-GUILLELMO FERRAND, Facultatis Artium & Chirurgiæ Magistro, è Regiâ Chirurgiæ Academiâ, antiquo Scholæ practicæ Professore, Regiæ Scientiarum, Humaniorum Litterarum & Artium Academiæ Rothomagensis Socio, nec-non Imperialis Apathistarum Academiæ Florentinæ Socio extraneo, *tueri conabitur*, FRANCISCUS DU JARDIN, Sueffionensis, præclaræ Facultatis Artium Magister in almâ Universitate Parisiensi, *Theseos Auctor*.

P A R I S I I S,
IN REGIIS CHIRURGORUM SCHOLIS,

*Die Sabbati 27^a Augusti, à sesqui-secundâ post meridiem
ad septimam, Anno R. S. H. 1768.*

P R O A C T U P U B L I C O

E T

M A G I S T E R I I L A U R E A.

Typis P. AL. LE PRIEUR, Regii Chirurg. Collegii
Typographi.